

**Basef Amama Pol Nagi'
Nanda'am Mafe'ma Esis
Korin
Basef bandami Pol nagi'
nanda'am mafe'ma esis Korin**

1:1-11 Pol nanda' beten nanifela Goda esis Kristen sape Korin

1:12-7:16 Pol na'ipasa basefa waf ape' Kristen manda'anai naloma nimanimi hiami anona nemaf meafa'ami

8:1-9:15 Otamba esis sakolasama soso' esis Kristen kwahusi

10:1-12:21 Pol na'ipasa basefa waf ananinai naloma nimanimi name'ama maol Kraisi. Ea' na'i Kraisi atona nagiambamana na'a nataga la'ifina

13:1-10 Basefa esis sundumafuma andeande' ma ina sila basef kwamaimi

13:11-14 Basef akutaimi maloma danifel Poli

¹ Ae' Pol, God nandandepa aposel Kraisi Jisasi. Ae' aloma owalomapa Timoti wasapa'ago basef amama ma ipe' amam nematawa Godi pape Korin pelomago amam nematawa hiesi Godi si'isi sape anama hiagoma esis Grik sapoma. ² Ae' a'i God Ahalomapa ape'inai noloma Dembinai Jisasi Kraisi migiambamepa na'a petaga la'ifipa monda' opalef ipe'imi mope awanem.

Pol nanifela Goda nagiambama anan

³ Ape' mefela agel Godi lu'una, anan God Ahalomana Dembinai ape'inai Jisasi Kraisi.

Anan Ahalomapa ape'inai, ofagonama okom nainailapa nati ape' uwahipipa. Anan God nanda' opalef nimanimi ape' hiapai mape awanemi. ⁴ Nimanimi hiami matagamapa anan nanda'apa opalef mape awanem. Nanda'am ama dei' ape' wila ma monda' opalef epes isima nimanimi mamumami matagamasi mope awanem si'i God nali' nagiambamapa. ⁵ Nimanimi lu'wami Kraisi nali' nofa'ami dei' ape' wapoti' mofa'am. Ea' na'ama etin opaf awaninai lu'unai ananinai dei' nase'alepa.

⁶ I'i dei' enis epes sose'afa nimanimi, amama magiambamepa monda' opalef ipe'imi mope awanem anona nemaf God nokwahomepa waf aonai nofa'epa pitanimani. Nemaf anama God nonda' opalef afa'imi mope awanem, Anan nanda' opalef ipe'imi awanem wapoti' ma pitu la'ifipama pefa' nimanimi amama si'i afa' ofa'ami. ⁷ Afa' ogawa endilisi wa'i ipe' paitu la'ifipa. Dei' main, afa' ogawa ipe' pefa' nimanimi palomafa ea' na'ama etin anona nemaf pefa' opalef awanimi pelomafa wapoti'.

⁸ Ipe' alupipei, afa' wa'i ipe' ata' pegawa nimanimi enis epes sase'afam gani etap hiagoma Esia. Nimanimi amama lu'wami endilisi ea' mahagofa afa', mikila' pepel afa'inai. Ea' afa' ukup ma'i endilisi nambimb afa' oga'. ⁹ Wameme'ma nimanimi amama lu'wami ea' ogawa wa'i endilisi etis afa' oga'. Ea' amama matagamafa ma afa' ina ukup ma'i pepel afa'inai atona, owa'. Amama matagamafa ma afa' ukup mopoma pepel Godi atona, anama nafela epes saga'i.

¹⁰ Esis sase'afa nimanimi lu'wami sanda'afa aofa

endilisi sa'i sohafa oga', ea' God nofa'afa otanimani. Ea' anona nemaf nigiambamafa wapoti'. Ukup afa'imi la'ifim ombale'efana endilisi ma anona nemaf nigiambamafa ma anom niman-imi lu'wami wapoti'. ¹¹ Ama dei' beten ipe' panda'mafanai etin, God nonda'mafam na'ama. Ea' God nambimb nogwa beten amam nematawa hiesi sanda'anai ma anan nofalo'mafa nigiambamafa na'a. Ama atuwasi amam nematawa hiesi ukup mopoma afa' ma sinifela Goda amamaga amama anan nanda'ami.

Pol ina nambaso'ma esis Korin, owa'

¹² Afa' wandanifel ma amamaga amama. Basef mape opalef ape'imi nomon mawalapa basef amama ma'ipafa wafe' waf bu'unai andeande' ma waf opalef bu'wami God naso' afa'. Gawa epes etapasasi ina nawalapa waf anama ma afa', owa'etin. God nati uwahipifa endilisi nagiambamafa na'a dei' wanda' waf na'ama. Wanda' waf anama na'ama la'afena epes hiesi sape etap anae' ea' wanda'am na'ama hianai ma ipe'. ¹³⁻¹⁴ Afa' ina wanda' anom basef ahifimi ma ipe', owa'. Wanda'am dende' si'i ipe' pitalifam pegawami. Dei' ipe' ina pegawa waf afa'inai andeande', ata' owa'. Ea' ae' okom na'i ipe' anona nemaf pegawa endilisi waf afa'inai hianai. Nemaf anama Dembinai Jisasi, ipe' pendanifela afa' na'ama etin si'i afa' anona nemaf ondanifel ma ipe'.

Pol na'i nefe'mago esis Korin ea' ina nafo'o. Na'ama enis ukup biefiga anan

¹⁵ Ae' egawa endilisi basef ali' a'ipipami ma waf bu'unai ipe'inai. Ea' fowa' ali' anda' okom

na'i efe'mago ipe' igiambamepa bifa ata' pegawa waf Godi wapoti'. Ea' ae' ina afo'o. ¹⁶ Ae' okom na'i ata' ili' efe'mepago ea' ekwahipa efe' etap hiagoma Masedonia ma nambimb ekwaha Masedonia etanimai ifi'mipai wapoti' ma pigiambame pesapa'e efe' etap hiagoma Judia. ¹⁷ Ipe' pa'i maim basef? Ae' a'iam ea' ma enda'am na'ama, ea' aho'ofa basef amama anda' dambaimi maho'ofam? O i'i ae' okom ni'i enda' anom amamaga, moho'ofam i'i basef biefim "A'e" neloma "Owa'" wapoti' si'i epes etapasai sa'iam? Owa'etin.

¹⁸ God anan nanda' amamaga andeande' na'i endilisi. Basef hiami afa' wasi'ipami endilisi atom na'ama etin. Afa' ina wa'i anom basef biefim, "A'e" naloma "Owa'" mape etifigin, owa'etin. ¹⁹ Nogalomana Godi Jisas Krai, ae' aloma Sailas waloma Timoti wawalapa basef ananiami, anan ina na'i na'ama na'i, "A'e" naloma "Owa'" atom, owa'. Krai na'i a'e etin.* ²⁰ Basef God na'iami ofagema mandawalap ma'i Krai atona, anan na'i a'e etin. Amama atom dei' ape' ma'i agel Jisasi atona ea' ma'i, "Endilisi" ma basef amama God na'i endilisi atom mafela agel ananinai lu'una. ²¹⁻²² God atona nanda'afa wataga la'ififa, ipe' wapoti', ea' mape la'ifipa paloma Jisasi Krai. Anan nanda'mapa ikwaf ananinai ape' nosahe'apa ma mope ananipai atepa ea' nase'apa Ambal Bu'unai Ananinai nape nomon opalef ape'imi. Ambal anama God nase'apanai nali' ma amamaga tu'wanim hiami

* **1:19:** Basef amama ma'i Krai na'i a'e etin ma'i Anan na'i basef endilisi atom.

bu'wami God na'i anona nemaf nease'apami.

Pol nandaiwa'ma nose'as nimanimi esis Korin ea' ina notanima nafe'ma esis, owa'

²³ Ae' a'i basef endilisimi atoma naep Godi. Ae' andaiwa' ma ese'epa nimanimi ipe'. Na'ama fowa' ae' ina afo'o Korin, owa'. ²⁴ Afa' ina wape wali'ma wihi'ambepa waf ipe' pembale'efa God, owa'. Dei' main, ipe' etipa paitu la'ifipa pembale'efana. Ea' dei' afa' wanda' maol walomepa ma onda'epa pendanifel.

2

¹ Okom ae'anai a'iam endilisi na'ama a'i, ae' ina ata' etanima efe'mago ipe' wapoti' enda' opalef ipe'imi nimanim, owa'. ² I'i enda' opalef ipe'imi nimanim, emi egafis sonda'e endanifel? Owa'etin. Ipe' etipa, ea' anda' ukup ipe'imi aom. ³ I'i ipe' pendanifel, andeande'. Waf anama bu'unai. Ea' i'i ae' efo'o ma penda' opaf ae'anai nimanina, na'ama andaiwa'. Ea' amama atom fowa' ali' anda' basef amama mafe'mago ipe'. Dei' main, ae' egawa ipe' endilisi na'ama. I'i ae' endanifel epe, ipe' hipei wapoti' pendanifel. ⁴ Endilisi anda'mepago basef amama ma nemaf anama opaf ae'anai ame' nimanimi lu'wami ea' alef hihif. Ae' ina anda' basef amama ma mese'epa opalef nimanim, owa'. Anda'ama ipe' pegawa ae' okom nainailipa endilisi.

Esis sokwaha waf aonai anona owalomas nanda'masanai

⁵ I'i enin epen ofagena nenda' opaf nimaninai netaga, enin ina nanda' opaf ae'anai atona nimanina, owa'. Enin nanda' ipe' hipei opalef nimanim wapoti'. Ae' a'i basefa ipe' hipei ea' enipa owa'. Ina a'ipipa. Andaiwa' ma i'i basef la'ifimi endilisi ma waf aonai anan nanda'anai, owa'. Amama atom dei' a'iam na'ama ma enipa owa'. ⁶ Nimanimi ipe' epes hipei pese'anami ea' mandahama anan. ⁷ Ea' dei' penda' anona wafa anan. Andeande'ma pekwaha waf aonai ananinai pi-giambamana notaga la'ifina penda' opaf ananinai awanena. Na'ama nimanimi lu'wami endilisi monda' okom ananinai aona ea' nokwaha Dembinai. ⁸ Amama atom dei' a'ipipa basef la'ifimi pihi'amba anan ipe' ukup maimailana. ⁹ Fowa' anda' basef amama mail okwatip a'ipipago ma egawa waf ipe'inai. Anda'am na'ama a'i egawa ipe' paila basef ae'ami la'ila'ef o owa'? ¹⁰ I'i ipe' pekwaha waf aonai enin epen nanda'anai, endilisi ae' wapoti' ekwahomanana. Waf anama aonai akwahanai okom ae'anai na'i na'ama. Ae' ina egawa okom Kraisi na'i na'imama, ea' i'i andeande'ma ae' ekwahomanana naep Kraisi, ekwahomanana endilisi ma igiambamepa pepe andeande'. ¹¹ Ae' anda'am na'ama ma Satan ina anona nemaf nombaso'mapa nikila'apa, owa'. Dei' main, afa' ogawa okom ananinai nambaso'ami.

Pol opaf nimanina wambel anama Troas

¹² Fowa' Dembinai nanda' eaf nafe' ae' afe' ataga wambel Troasa awalapa basef bu'wami Kraisi. ¹³ Ea' opaf ae'anai ina nape awanena, owa'. Dei' main, ae' ina ata' ati owalome ae'anai

Taitus, owa'. Ea' akwaha esis Troas afi'i ataga anona etap hiagoma Masedonia.

Pepel Godi atona amam aposel mali'amona wandafa waf aonai

¹⁴ Ea' dei' afa' wanifela God. Anan la'ela'ef nagiambamafa wape la'ififa waloma Krais ea' wali'amona wandafa waf aonai. Ama maol afa'inai God nawalapa basef ea' enis epes sogawa basef Kraisi. Gawa anama anan si'i alogw bu'wami ma mafe'agon hiagoma. ¹⁵ Endilisi afa' si'i alogw bu'wami ma mataga Krais mafe'ma God. Alogw amama mafe' la'afena epes isima dei' God nakwahomas waf aonai nofa'as sotan-imani, isima sape eaf nafe' heveni saloma isima sape eaf higililasanai wapoti'. ¹⁶ Ama wambota anama epes sape eaf higililasanai, alogw amama hi'apimi si'i saga'i. Ea' wambota anama sape eaf nafe' heveni, alogw amama bu'wami mase'as ambal namunai. Ea' dei' afa' ukup ma'i maol anama Godi wa'i ina enis epes la'ifisa onda'ana, owa'. Ea' afa' la'ififa wanda'ana. ¹⁷ Dei' main, afa' ina si'i enis epes hiesi safe'agon hi'alagona sanda' maola basef Godi ma sofa' amamaga asasimi atom, owa'. Afa' wanda' maol anama Godi na'ama. Afa' ina wambaso'am etina maol Godi, owa'. Afa' wanda'am waila eaf bu'unai atona hi'alana, wape la'ififa waloma Krais. God nasapa'afa wafi'i wawalapa basef mafe' ande-ande'ma naep ananimi.

3

Amam manda' maola basef dambaimi God na'i endilisimi atom

¹ Basef amama do'okimi ipe' pa'i afa' wafela agof afa'imi atom lu'una wapoti' si'i anom amam mambaso'mepa manda'am? O pa'i afa' owa' la'ififa wanda'am si'i amama ose'epa anom basef mail pasi enis epes sanda'ami ma sefela agof afa'imi? O ipe' wapoti' nambimb penda' anom basef mil pasa pigiambamafa? Owa'etin. ² Basef mail pasi sefela agof afa'imi si'i ipe' etipa. Basef amama mail la'ifim nomon ukup afa'imi. Ama epes hiesi sotalifam sogawam. ³ Ipe' pandawalap alihipa, pas amama ea' ipe' etipa. Krais atona nanda' basef maila pas amama. Anan nandan-depafa nase'afa pas amama wafo'o wasi'ipami. Anan ina nanda' ing nufandiam, owa'. Anan nufandiam Ambal Bu'unai God nape namunai. Anan ina nufandiam mail anona owap wa'anai si'i buk, owa'. Nufandiam mail ukup ipe'imi nomon.

⁴ Basef amama ofagema na'ama. Krais na-giambamafa endilisi ea' ombele'ef la'ififa ma God wape na'ama. ⁵ Endilisi afa' atofa ina la'ififa ma onda' maol anama, owa'. God atona nanda'afa la'ififa ma wanda' maol anama ananinai. ⁶ Ea' anan atona nanda'afa la'ififa ma wanda' maola eaf basef dambaimi God na'i endilisimi atom. Basefa mi'uli anama ina sanda'am mail pas atom, owa'. Amama Ambal Bu'unai Ananinai nawalapa-pami. Basef sanda'am mail pas atom maha epes saga', ea' Ambal Bu'unai Ananinai nanda'as sofa' ambal namunai sope namis.

⁷ God nanda' basef amama fowa'imi ma mi'uli Ananinai mail otam wa'anai si'i buk. Maol Godi amam manda'ami, amama matagama ga' naloma nafifli ananinai bu'unai wapoti'.

Nali' damba damba nafifili anama nanda' amaga Mosesi nafifil endilisi. Ea' nagi' nataga so'uso'una. Anama la'ifinai endilisi ma esis Israel ina la'ifisa siti amaga ananinai, owa'.⁸ Ea' nafifil ma maol Godi Ambal Bu'unai Ananinai nanda'anai lu'una endilisi nikila' anama fowa'inai.⁹ Maol fowa'inai nawaloga epes hegilolas, anama nawalapai nafifili Godi. Ea' maol anama dei'inai nanda' epes sataga bo'wes ea' God na'i esis bo'wes andeande'. Maol anama dei' nawalapai nafifili ananinai lu'una endilisi nikila' anama nali'i.¹⁰ Endilisi, nafifili fowa'inai ina nafe' na'ama etin si'i dei'inai, owa'. Fowa'inai falafunai atona ea' dei'inai lu'unai nikila' endilisi.¹¹ Maol anama dei' na'i hegilionai, anama fowa' nataga naloma nafifili Godi. Ea' nafifili dei'inai ma maol anama nape la'ela'ef lu'una endilisi nikila' anama nali'i.

¹² Afa' wanda' maol Godi ogawa basef amama dambaimi God na'iam endilisimi atom ea' wape ohafa nahafifili anama anona nemaf notagamafa. Ea' afa' ina umbamahafa, owa'. Afa' la'ififa endilisi.¹³ Afa' ina wape si'i Moses, owa'. Anan nawala lowaf amaga ananinai nambaho'ana ma esis Israel ina siti nafifili anama nefe' so'uso'umbela hi'ilana, owa'.¹⁴ Ea' ukup asasimi mase'as endilisi. Dei' main, esis la'ela'ef satalifa basef mail Baibeli fowa' God na'i endilisimi atom. Nemaf mamana satalifa basef amama, lowaf anama wa'anai nape amaga Mosesi ata' nape la'ela'ef nasopama ukup asasimi nafi'i nafi'i nataga dei'. Ina nandatagah, owa'. Ama Krai atona, God nahape' lowaf anama.¹⁵ Fowa' satalifa basef Moses nanda'ami safi'i sataga dei', lowaf anama ata' nase'ala

opalef اساسيمي لا'ela'ef. ¹⁶ Ea' emi egafis som-boma opalef sefe'ma Dembinai, dei' lowaf anama nendatagah. ¹⁷ Dembinai anama anan Ambal Bu'unai Godi. I'i Ambal Dembinai nope enin epen, ina ata' anom amamaga mili'akwa enin, owa'. Enin nape wafifin. ¹⁸ Ea' ape' hiapai dei' mape amagah wafimi, nafifili bu'unai Dembinai nafifima ape', ape' mififima enis epes. Ape' mape na'ama dei' Ambal Bu'unai Godi naho'ofa waf ape'inai ea' mandati si'i Dembinai ma nafifili anama nataga lu'una la'ela'ef nafe' etin nape. Amama mataga Dembinai atona, anan Ambal Bu'unai Godi.

4

Amam aposel si'i maloh sanda' etap sanda'ami

¹ God na'i afa' uwahipifa dei' nase'afa maol anama. Ea' dei' afa' ina otanima ma maol anama, owa'. ² Afa' owa' alafugah ma waf ambagof awami sandambaho' sanda'ami. Ina ata' wape wafe' waf anama baso'mainai oho'ofa waf ombaso'masa basef Godi wa'iam, owa'. Afa' wawalapa basef endilisimi alihima naep Godi ma epes hiesi seme'am sogawa basef mape opalef اساسيمي nomon ma'iami. ³ I'i basef amama bu'wami Godi wawalapami mondambaho', mandambaho'ma epes isima safe' eaf hegilalasanai. ⁴ God baso'omunai ma etap anae' nasopama opalefa epes isima owa' sembale'efa Godi. Ama basef amama bu'wami ofagema ma nafifili Kraisi ina muwis nomona opalef اساسيمي, owa'. Esis ina sati Krai nandati na'a si'i God, owa'. ⁵ Dei' main, afa' ina wawalapa basefa afa' ofela agof

afa'imi lu'um, owa'. Afa' wawalapama Kraisi Jisas atona anan Dembinai. Afa' waila waf Jisasi dei' agof a'afa wape owina ipe' wanda' maol wagiambamepa. ⁶ Fowa' gani God nati owamb atona na'i, "Lala notaga."

Dei' na'ama etin nanda' nafifili ananinai nataga ma afa' nanda' opalef afa'imi mafifil endilisi. Nafifili anama nihi'ambapa gawa ma nafifili pepel Godi nape la'ela'ef. Ape' mati anama ma waf Jisas Kraisi nafifili nataga amaga ananinai.

⁷ Ea' amamaga amama bu'wami nafifili naloma pepel Godi, anama nape opalef afa'imi nomon, afa' si'i maloh sanda' etap sanda'ami. Ama mihi'amba epes hiesi sogawa pepel anama Godi atona. Afa' owa'. ⁸ Fe' pe waf afa'inai fowa' dei' wapoti' nape na'ama. Anama hiagoma wafe'ma la'ela'ef nimanimi matagamafa, ea' amam ina mahambombagafa endilisi, owa'. Amamaga hiami masopama ukup afa'imi, ea' ukup afa'imi ina higilalam hi'alam, owa'. ⁹ Enis epes sahafa sanda'afa aofa, ea' God ina nakwahofa, owa'. Esis sahafa hihif owa wa'oh etap, owa'etin. Ina afufa endilisi, owa'. ¹⁰ La'ela'ef afa' ofa' nimanimi ma ga' Jisasi alop afa'inai wafe'. Wanda'am na'ama ma ambal namunai nape Jisasi wapoti' notaga alihina alop afa'inai. ¹¹ Dei' main, afa' wanda' maol Jisasi. Amama atom dei' nimeguf hiami la'ela'ef enis epes sa'i sohafa ofa' nimanimi oga'. Sanda'afa na'ama ma ambal namunai nape Jisasi notaga nondawalap alop afa'inai. ¹² Ea' dei' epes isima sa'i sohafa oga' ma ipe'

pembale'efanai pefa' ambal namunai pepe ande-
ande'.

¹³ Baibel na'i, "Ae' embale'efa God. Amama atom dei' awalapa basef alihim a'iam."

Afa' wambale'efa God na'ama etin si'i Baibel na'i dei' wawalapa basef wa'iam. ¹⁴ Dei' main, afa' ogawa God nafela Dembinai Jisas nohafel hi'agif, anan nofela ape' wapoti' moloma Jisas ea' nofa' afa' oloma ipe' nokolasepa atogon mofe' mope felefele' molomana. ¹⁵ Amamaga amama nimanimi hiami matagamafa ma wigiambamapa. Afa' wafe' wa'ipasa basef God nigiangamas na'a mefe' motaga la'ela'ef mefe'agon hi'ilagon. Ea' esis sonda' beten sinifela God sefela agel ananinai lu'una.

¹⁶ Afa' ukup mapoma amama dei' ina otan-
ima ma maol Godi, owa'. Endilisi, pepela alop afa'inai la'ela'ef na'i nowafa hi'ilana. Ea' opalef afa'imi mataga dambaim wapoti' nimeguf hiami hihif. ¹⁷ Nimanimi amama matagamafai amama sa'osa'om endilisi ea' mape nogota bandana. Nimanimi amama anona nemaf mowalapai nafifili bu'unai endilisi gani heven la'ela'ef hihif. Pe anama bu'unai anona nemaf nikila' endilisi nimanimi amama so'umi dei'imi. ¹⁸ Dei' main, afa' ina wati la'ifipa amamaga satolom naepi, owa'. Amamaga owa' seatolom naepi, watolom la'ififa. Dei' main, amamaga satolom naepi, amama anona nemaf mope nogota bandana. Ea' amamaga amama owa' seatolom naepi, amama mape la'ela'ef hihif.

Amam aposel mombale'efa God mofa' pepel Ananinai

¹ Dei' afa' ogawa na'ama. Nema'f anama ipat anama sowalo' selanai sanda'ana etap anae' non-datal aona, ea' hapainai. Afa' anona ipat God na'i nose'afanai dambainai. Ipat anama epes ina sanda'ana sala'ana lagof asasimi, owa'. Anama napani heven ea' notawa la'ela'ef hihif. ² Dei' afa' wape alop afa'inai si'i ipat notawa etap anae', ea' opalef nimanim wape. Afa' ukup ma'imali endilisi ma ipat anama afa'inai nape heveni ma anona nema'f nose'ala alop afa'inai si'i luwaguf. ³ I'i afa' ola luwaguf amama, alop afa'inai ina anona nema'f nope wafina, owa'. ⁴ Nimeguf hiami afa' ata' wape etap anae' wape la'ela'ef hihifa ipat anama sowalo' selanai ea' opalef nimanim alop atona wafina wape. Afa' ina wandaiwa'ma okwaha alop dei'inai, owa'. Afa' wa'i undausa alop dambainai si'i luwaguf ama alop anama na'i naga'i anona nema'f nondamboma notaga ambal namunai endilisi. ⁵ God atona nandon-dombafa ma ofa' alop anama dambainai ea' nase'afa Ambal Bu'unai Ananinai. Ambal anama nali'ma amamaga amama hiami nanda'ami ma na'i anona nema'f nose'afam afa' ea' ogawa endilisi anona nema'f nose'afam.

⁶ Ea' dei' amamaga amama la'ela'ef manda' opalef afa'imi motaga la'ifim. Afa' ogawa alop afa'inai ata' si'i ifagw afa' wapeimi. Ama nogota anae' wape alop anae', ina dei' wape waloma Dembinai ma wambel ananinai, ata' owa'. ⁷ Dei' ata' ombale'efana wafe'. Afa' ina dei' watonona, ata' owa'. ⁸ Ea' afa'ogawa opalef afa'imi

mape la'ifim, ukup mohafel endilisi ma okwaha alop dei'inai ofe' ope oloma Dembinai wambel afa'inai. ⁹ I'i ope olomana ilif o ope etap anae', hapaimi. Afa' la'ela'ef ukup mali' mahafel la'ififa wila okom Dembinai atona. ¹⁰ Ape' mogawa endilisi anona nemaf ape' hiapai motaga ma kot anama Kraisi. I'i ape' monda' waf bu'unai o waf aonai nogota anama ata' mape alop ape'inai. Owagama ape' hiapai atona etin mofa' amamaga amama bu'wami o awami mogwama waf anama ape' manda'anai.

Amam aposel manda' maol magiambama esisa sotaga opalef etifim soloma God

¹¹ Afa' umbamahafa ma Dembinai. Amama atom dei' wanda' maola wafela nomonas epesi ma sembale'efana. Naep Godi afa' wape alihifa ea'. Ae' okom na'i na'ama a'i waf afa'inai nandawalap alihina basef mape opalef ipe'imi nomon ma'iami. ¹² Basef amama afa' ina wa'i ofela agof afa'imi atoma ipe' pi'i afa' amam bu'ufai, owa'. Wa'i onda' eafa ipe' pendanifela afa' ma naep enis epesi. Wanda'am na'ama ma ipe' la'ifipa ma pegwamasa basef epes isima sandagala ma enis epes etina alop atona owa' sendanifela waf bu'unai asasinai. ¹³ I'i endilisi afa' ope si'i ukup mahaga magaoli, hapaifai. Afa' wanda'am na'ama ma ofela agel Godi. I'i endilisi afa' ukup mopomas andeande', afa' wanda'am na'ama ma wagiambamepa. ¹⁴ Okom Kraisi nainailapai nafelafa ma maol amama. Dei' main, afa' ukup ma'i mogawa endilisi na'ama. I'i aman atotona noho'ofa ape' hiapai ma naga', amama si'i ape' hiapai maga' ea'. ¹⁵ Ea' anan naho'ofa

ape' hiapai naga' ma ape' epes mope namepa ma ina ukup motamea ma ape' atepa, owa'. Ape' ukup ma'i aman anama naho'ofapa naga' ma notanima nohafel wapoti', ukup ma'i maol ananinai la'ela'ef.

¹⁶ Amama atom dei' afa' ina ata' waila opaf apinai wawaloga waf enin epeni, owa'. Endilisi, fowa' waila wafa opaf apinai wawaloga Kraisi na'ama. Ea' dei' owa'. ¹⁷ Emi egafis sope soloma Kraisi, God nanda' esis sataga dambais endilisi. Dei' peme' andeande'. Waf anama apinai asasinai hi'alana. Dei' saila waf dambainai. ¹⁸ God atona ofagonama waf anama epes sataga dambais. Fowa' ape' ata' mape naumbih malomana, ea' Kraisi nataga nanda'apa mape opalef etifim maloma God. Ea' God nase'afa maol anama ma wigiambama anona onda' esis naumbih ananisi sotaga opalef etifim solomana.

¹⁹ Basef afa'imi na'ama. Kraisi atona God nanda' maol nanda' epes hiesi sakwaha waf naumbihinai sataga opalef etifim salomana. Anan ina ata' okom na'i waf aonai esis sanda'anai, owa'. Ea' nase'afa maol anama ma owalapa basef ananiami ma nonda' esis naumbih sotaga opalef etifim solomana. ²⁰ Ea' afa' dei' ofa' malogel Kraisi wawalapa basef ananiami. Amama na'ama etin. God atona nofala epes hiesi ma basef la'ifimi malogof afa'imi. Ea' waho'ofa Kraisi wa'ipas na'ama wa'i, "Ipe' pekwaha waf naumbihinai ma petaga opalef etifim peloma God."

²¹ Aman anama ina nanda' waf aonai ea' God nakolasa awami ape'imi hiami mafe'ma anan atona ea' ofagema ape'imi mapoma anan atona

nofa'am. Anan nanda'am na'ama ma ape' mape la'ifipa maloma Jisas Krais mefa' waf ananinai bu'unai.

6

Amam aposel mofa' nimanimi hiami ma maol Godi

¹ Afa' wanda' maol Godi wandao'oma walo-mana. Dei' wa'ipipa basef la'ifimi na'ama wa'i, "God nagiambamepa na'a. Na'ama ipe' ukup mose'epa waf anama nagiambamepa na'a, owa'." ² Peme!. God na'i na'ama na'i, "Nemaf ae' ati uwahipipanai anama ame' basef ipe'imi. Nemaf anae' ae' agiambamepa a'i efa'epa petanimani."

Peme!! Dei' God nati uwahipipa. Dei' God na'i, "Ae' ekwahomepa waf aonai efa'apa pitanimani."

³ Afa' wandaiwa'ma epes si'ipafa basef awami ma maol Godi afa' wanda'anai. Amama atom dei' wandaiwa'ma onda' anom amamaga ma waf aonai monda' enis sondasisi'ip sowa, owa'.

⁴ Ea' la'ela'ef wihi'amba epes hiesi wanda' maol Godi. Dei' wihi'ambas na'ama. Waitu la'ififa endilisi ma nimanimi mamumami ma amamaga ma'i mohambombagafa. ⁵ Esis sahafa sanda'afa wanda' kalabus. Esis naumbih sanda'afa aofa sa'ipafa awagon. Afa' wanda' maol lu'unai endilisi. Ina wa' gwa'aimi wape wa'oh andeande', owa'. ⁶ Wanda' waf bu'unai ea' wahapila gawa bu'unai, opalef awanem waitu la'ififa ma nimanimi. Wanda' waf bu'unai ma enis epes. Ofa' pepel Ambal Bu'unai Godi, wanda' waf anama endilisi ma ukup maimaila enis epes wagiambamas. Ina

wa'i basef malogof atom, owa'. ⁷ Wawalapa basef endilisimi wanda' maol waloma pepel Godi. Afa' waila waf bu'unai si'i wahapila amamaga wapa'ami lagof biam da'isinai iganai. ⁸ Enis epes safela agof afa'imi ea' enis sandaha basefafa. Enis sa'i basef awami sa'i sase'afa alafugah ea' enis sa'ipasa basef enis epesa waf bu'unai afa' wanda'anai. Esis ukup ma'i sa'i afa' epes wambaso'ami ea' esis etis epes sambaso'ami. Afa' wa'i endilisi. ⁹ Wanda'am na'ama, ina enin epen negawa afa', ea' hiesi sogwafa. Afa' si'i epes waga'i, ea' owa'etin. Afa' ata' wape namofa. God ata' nahafa bolam nanindinafa, wandanifel ea' anan ina nahafa afufa, owa'. ¹⁰ Afa' opalef nimanim endilisi, ea' la'ela'ef wandanifel. Wape si'i isima amamaga a'asi kwahusi ea' wase'asa amamaga afa'imi ma epes hiesi. Afa' amamaga a'afa si'i isima kwahusi, ea' waf bu'unai Godi nihi'ambafa wape si'i amamaga hiamifai.

¹¹ Ipe' Korin alupipei, ae' a'i basef hiami bu'wami mape okom ae'anai awalapama ipe' alihim hi'alam, ae' okom nainailipa endilisi si'i alupisi ae'asi. ¹² Ae' ina opaf aona ma ipe' esambalipa, owa'. Ae' okom nainailipa endilisi. Ea' ipe' opalef aoma afa. Ea' ina mape opalef etifim endilisi, owa'. ¹³ Dei' ae' ahalomepa, ipe' si'i awasi ae'ipei. Ipe' ukup mimili si'i ae' okom nainailipa endilisi.

Ape' si'i ipat Godi lu'unai sanda' lotuwana

¹⁴ Epes isima owa' sombale'efa Godi, ipe' ina pelomas pepe pefe' etifigin atogon, owa', hapaisi. Dei' main, waf anama bu'unai ina nape etifigin

naloma waf anama sosambala basef Godi, owa'. Dei' maina owambi alip mandakolas etifigin? Owa'etin. ¹⁵ Pa'i Kraisi naloma Satan mape mefa' ukup etifim? Owa'etin. Dei' epes isima sembale'efa Godi saloma epes isima owa' sombale'efa Godi sofa' nomonas etifim, anona nemaf esis sonda' maina waf? Owa'etin. Ina sanda' anona waf bu'unai, owa'. ¹⁶ Dei' a'ipipa basef amama afela ukup ipe'imi. Ea' ina andeande'ma mokolasa ipat lu'unai Godi noloma amamaga baso'maimi sanda'am sanda' lotumami, owa'. Ipe' pegawa ape' atepa si'i ipat anama God napa'ina nomon. Si'i fowa' Anan na'iam na'i,

“Owagama ae' epe elomas efe' la'afena esis ea' epe God asasiwei ea' esis wapoti' sepe epes ae'asi.”

¹⁷ Ea' Dembinai na'iam wapoti' na'i,

“Ipe' pekwaha esis pefe' pepe anagon. Ea' ipe' ina pihapila amamaga alugumi awami, owa'. Ama atuwasi ese'epa opaf ae'anai efa'epa petanimani. ¹⁸ Ama epe Ahalomepa ipe'iwei ipe' pepe awasi amam nematawa ae'ipei. Dembiwei ofagewema pepel hianai a'iam na'ama.”

7

¹ Ipe' alupipei afa'ipei endilisi, ape' mofa' basef amama Godi endilisimi la'ifimi. Ea' mokwaha amamaga amama awami mape nomona alop naloma ambagof ape'imi ea' mope bu'upai umbamahepama God mila waf bu'unai.

Esis Korin samboma opalef, dei' Pol nandanifel

² Ipe' dei' pese'afa opalef ipe'imi. Afa' ina wanda' enin epen ipe'ini awen o wahambombaga enin, ola'ipa enin epena amamaga ananiami, owa'. ³ Ae' awalapa basefa ipe', ina a'ipipa a'i ofagema ipe'imi atom, owa'. Ae' a'iam a'i afa' wase'epa opalef afa'imi ipe'. Wanda'am na'ama ma i'i ipe' pega', afa' oga' olomepa. I'i pepe namipa, afa' wapoti' ope namofa olomepa. ⁴ Ae' okom na'i endilisi ipe' pape andeande'. Andanifel endilisi ma ipe'. Nimaniami hiami matagama ae' ea' okom ae'anai nape naloma ipe', amama atom dei' manda' opaf ae'anai nape awanena andanifel endilisi.

⁵ Fowa' afa' wafi'i otaga etap hiagoma Masedonia, alop afa'inai ina napoma noma'w owa'. Nimaniami mamumami hiami matagamafa, sa'i basef la'ifimi safitap salomafa. Ea' umbamahafa ukup matamea. ⁶ Ea' God nanda' epes isima opalef nimaniami sataga laifis nasapa' Taitus natagamafa nanda'afa wataga la'ififa. ⁷ Ina Taitus atona natagamafa dei' God nanda'afa la'ififa, owa'. Ipe' panda' Taitus nataga la'ifina, amama atom dei' God nanda'afa wataga la'ififa wapoti'. Taitus na'ipafa na'i ipe' ukup mohafel endilisi ma pa'i petolowe ea' opalef ipe'imi malefa fowa' pase'e nimaniami ae'. Ea' ukup ipe'imi mohafel endilisi ma pepe opalef etifim pelome. Amama atom dei' andanifel endilisi ikila' fowa'.

⁸ Endilisi ae' egawa basefa pas anda'am mali' mafo'o manda' opalef ipe'imi aom, ea' ae' ina opaf aona ma amama, owa'. Endilisi, fowa' ae' okom nimanina ea' dei' owa'etin. Ae' egawa pas amama manda' opalef ipe'imi nimanim, ea'

amama nogota bandana atona. ⁹ Ea' dei' ae' andanifel. Ina andanifel ma basefa pas amama manda' ukup ipe'imi nimanim, owa'. Ae' andanifel ma amama manda'epa pamboma opalef pafe'ma God. Ae' egawa God atona nawalapai nimanimi amama ipe'imi ma nagiambamepa. Dei' ipe' pegawa afa' ina wanda'epa aopa, owa'.

¹⁰ Waf Godi na'ama. Nimanimi maim anan nawalapami manda'apa mamboma opalef mafe'ma anan nokwahomapa waf aonai nofa'apa motanimani. Ea' mape andeande'. I'i opalef nimanima waf etapanai, anama aonai nawalapai waf saga' safe' wambel aonai. ¹¹ Ipe' ukup mi'i andeande' ma nimanimi amama ipe'imi. God nanda'am mawalapai waf bu'unai naninani hianai ma ipe'. Amama mafelepa pahafel ulala pekwaha waf aonai ipe'inai. Ipe' ambagof aoma epen inima ipe'ini nanda' waf aonai, amama atom dei' umbamehepama basef a'ipipama okom wandafunai Godi. Opalef ipe'imi malef endilisi ma pa'i petolowe ea' la'ifipama pegalo'ma epes isima sanda' waf aonai. Ipe' pagalo'ma epen inima napani laogon. Panda'am na'ama ma pihi'amba epes hiesi waf aonai ofagena a'epa ma amamaga mali' matagamapei.

¹² Ea' endilisi fowa' anda'mepago amefa basef amama mail okwatipi ae' ina okom na'i epen inima nanda' waf aonai, a'i inima nefa' nimanimi ma waf anama, owa'. Ae' a'i waf ipe'inai notaga nondawalap alihina ma naep Godi ma pegawana andeande' na'ama. Ipe' ukup maimailafa endilisi. Amama atom ae' fowa' anda'mepago basef

amama. ¹³ Waf anama ipe'inai nanda'afa wandanifel nanda'afa wataga la'ififa.

Ea' ina afa' atofa wandanifel, owa'. Taitus wapoti' nandanifel endilisi. Dei' main, ipe' hipei panda' ambal ananinai napoma noma'w. Afa' wati amama atom, wandanifel endilisi. ¹⁴ Nimbewa' afela agof ipe'imi lu'uma naep Taitusi ea' dei' ae' ina ambal aona ma waf anama, owa'. Basef hiami afa' wa'ipipami amama endilisimi. Ea' na'ama etin basef afa' wali' wafela agof ipe'imi ma naep Taitusi, amama wapoti' mataga mafe' alihim, amama endilisimi.

¹⁵ Fowa' anan nali' nafe'mago ipe', ipe' hipei pase'ana opalef paila basef ananiami umbamahepa ma pesambalom. Anan okom nape na'i amama la'ela'ef dei' okom ananinai nainailipa endilisi. ¹⁶ Dei' ae' andanifel endilisi ma egawa ipe' hipei panda' waf hianai andeande' la'ela'ef.

8

Esis Kristen sape etap hiagoma sagiambama esis alupusi sase'asa otamba

¹ Ipe' alupipei, dei' a'i i'ipipa ma pegawa waf esis sios Kristen hiesi sape anona wambel etap hiagoma Masedonia sanda'anai. God nagiambamas na'a nihi'ambas waf bu'unai sagiambama enis epes kwahusi. ² Nimaniami lu'wami matagama esis ea' amama magwamba opalef asasimi endilisi. Ea' nogota anama esis sape amamaga a'as endilisi. Ea' esis sofa' danifel lu'unai nalomam. Ea' esis ukup ma'i enis Kristen kwahusi, satama otamba maim hiami ma sigiambamas. ³ Ae' egawam ea' awalapam

a'iam mandawalap alihim. Amama amamaga kwawie'im ma'omasi esis wilama sose'asam, esis sase'asam. Ea' ina sase'asa amama atom, owa'. Sase'asa anom hiam wapoti. Ea' sataga kwahusi endilisi ma amamaga. Esis saila ukup asasimi atom, ea' dei' sase'asam. ⁴ Ea' esis la'ifis endilisi ma afa' wi'i aho'ma sonda' maol Godi soloma enis Kristen sigiambama epes Godi kwahusi sape etap hiagoma Judia. ⁵ Fowa' afa' ukup ma'i na'ama wa'i nambimb esis sose'as anom otamba. Ea' esis sali' saso' esis etisa Dembinai saila okom Godi sase'afa opalef asasimi afa' wapoti ma sose'afa anom otamba sigiambama esis Kristen kwahusi. ⁶ Fowa' Taitus nafela maol anama ma ipe' pagiambama Kristen amama atom. Amama atom dei' afa' la'ififa ma anan nigiangamapa ma pembefa maol anama hi'ilana. ⁷ Alupipei, amamaga hiami ipe' panda' waf bu'unai endilisi, pikila' enis epesa waf anama. Ipe' pembale'efa God la'ifipa. Ambal Bu'unai Godi nase'epa gawa nafelepa ma pewalapa basef bu'wami ananiami. Ipe' pahafel endilisi ma panda' maol Godi ea' ukup maimailafa wapoti'. Ipe' panda' waf anama bu'unai na'ama. Dei' afa' wa'i ipe' penda' anona waf bu'unai wapoti'. Pigiambama esis Kristen kwahusi pese'as anom amamaga na'a.

⁸ Dei' ae' ina a'ipipa la'ifimi, owa'. Do'ok a'ipipa ma waf esis Kristen sape Masedoniai sanda'anai. Esis sape kwahusi endilisi ea', ukup mahafel endilisi ma sagiangama enis epes na'a. Dei' a'ipipa basef amama ma ewaloga waf ipe'inai ukup maimailasanai. Ae' a'i egawa waf anama nape bo'ona endilisi si'i enis Kristen, o

owa'? ⁹ Endilisi, ipe' pegawa eaf dembinai Jisas Krais nagiambama na'a. Eaf anama na'ama. Fowa' anan amamaga hiamunai, ea' dei' nataga wafinai endilisi. Nagiambamepa na'a nataga nape kwahunai, amama atom dei' ipe' pefa' waf bu'unai naloma amamaga hiami bu'wami. ¹⁰ Okom anama ae'anai dei' awalapana ma ipe'. Afagel do'okinai ipe' pali'a enis epes ukup mohafela pagiambama enis epes kwahusi ea' panda'am pali'. ¹¹ Amama atom dei' penda'am pembefam. Ipe' fowa' ukup mohafel endilisi ma pagiambamas. Ea' dei' wapoti' na'ama etin penda'am hi'ilam dende' na'ama etina amamaga ma'omepa. ¹² I'i ipe' penda'am na'ama God natolom na'i waf bu'unai ma okom ananinai. Ea' amamaga a'ipei, hapaimi. God nogawam.

¹³ Ae' ina a'ipipa pigiambama enis sope ande-ande'ma ipe' pepe aopa, owa'. A'i ipe' hipei pepe dende' na'ama etin. ¹⁴ Dei' nogota anae' amamaga ipe'imi amama magiambama epes isima amamaga a'asi. Ama anona nemaf ipe' amamaga a'epa, amamaga asasimi motanima migiambama ipe' amamaga a'epa. Penda'am na'ama ma pepe dende'epa na'ama etin. ¹⁵ Amama si'i Baibel na'iam na'i,

“Epen nefa' amamaga hiami, amama ina hiam si'im endilisi, owa'. Ea' epen nefa' amamaga kwawie'im, enin ina kwahuna anom amamaga, owa'.”

Taitus naloma amam biam manda' maol Godi nambimb mofe' Korin

16 Ae' anifela God, anan nafela okom Taitusi ea' nomonas etifim si'i ae'. Ea' okom nohafel endilisi ma nigiangamepa. 17 Anan ina naila basef afa'imi atoma osapa'ana nafe'mago ipe', owa'. Anan okom nohafel wapoti' ma maol anama. Ea' dei' okom ananinai atona na'i nefe'mago ipe'. 18 Ea' afa' nambimb osapa' anona alupunai nofo'o nolomanago. Dei' main, aman anama ag-ilinai esis Kristen hiesi nanda' maol nawalapa basef bu'wami Godi. 19 Ina amama atom, owa'. Esis sios hiesi sandandepana ma nefe' nolomafa ofa' otamba ipe'imi ma wigiambama Kristen isima kwahusi. Afa' ukup ma'ima'i maol anama afa'inai. Afa' onda'ana ofela agel Dembinai atona ma wihi'amba epes hiesi sogawa opalef afa'imi mohafela wigiambamas.

20 Afa' wandaiwa'ma enin epen ni'i basef awami ma waf afa' wanda'ana umafi otamba amama hiami ipe' paloma enis epes panda' ofa mami. Amama atom dei' afa' wa'i osapa' owalomafa anama nifi'i nefe'mago ipe'. 21 Afa' ukup ma'i onda' waf bu'unai atona ma epes hiesi. Ina naep Dembinai atom, owa'. Naep epesi wapoti'.

22 Ea' afa' wa'i osapa' anona aman owalomafa afa'inai nifi'i nolomago amam biam. La'ela'ef afa' watolona wandomana ma maol hianai nanda'anai naninani. Ea' wati anan okom nohafel endilisi ma nanda'ana. Dei' anan nogawepa endilisi na'i ipe' panda' waf bu'unai atona. Ea' anan la'ifina endilisi ma nigiangamepa umafi otamba amama afa' ofa'am ofo'o.

23 Taitus ipe' pegawana. Afa' wandao'oma wanda' maol etin ma wangiambamepa. Alupumi

biam mofo'o molomanai mofa' malogof esis sios hiesi mofo'o. Amam manda' maol Kraisi mafela agel ananinai. ²⁴ Ea' ipe' pihia'ambanago waf ukup mimila enis epes. Penda'am na'ama ma amam wanom ama esis Kristen hiesi sogawa endilisi waf anama ipe'inai, ma sogawa wapoti' afa' wa'i endilisi nambimb ipe' pigiambama esis kwahusi.

9

Esis sase'asa amamaga sigiambama epes Godi amamaga a'asi

¹ Ipe' pegawa maol bu'unai pigiambama esis amam nematawa Godi amamaga a'asi. Ea' ae' ina enda' anom basefa amama, owa'. ² Ae' egawa, opalef ipe'imi mohafela panda' maol anama ea' la'ela'ef afela agof ipe'imi ma naep esis Kristen sape etap hiagoma sape Masedonia. A'ipas na'ama a'i, "Afa'gel nali'i esis Grik sape Korini sandondombam ea' ma sonda' maol anama."

Ea' esis Kristen sape Masedonia same' basef amama ma ipe' ukup mohafel ma maol anama. Dei' amama mafela ukup esis Kristen sape Masedoniai hiesi ma sonda'am wapoti'. ³ Ea' ae' andaiwa'ma basef afa' wafela agof ipe'imi ma esis Kristen Masedoniai motaga falafumi atom, owa'. Amama atom dei' esapa' owapepa ipe'imi wanom mofe'mago ipe'. Andeande'ma ipe' pendondombam, pepe si'i a'ipipam. ⁴ I'i owa', enis Masedonia sifi'i solome siti ipe' ata' owa' pendondombam, afa' ambagof aom ma amama ea' ipe' wapoti' pelomafa. Dei' main, afa' wali' wa'ipipas wa'i ipe' panda'am pandondombam ea'. ⁵ Ea'

ae' okom na'i i'ipa amam alupumi wanom mehpa muli' mofo'o motagamepa ma mondon-domba otamba amama ma'um pali' pa'iam pa'i pese'asami. Ea' penda'am na'ama ma nemaf ae' efo'o pendondomba otamba amama hiami mo'oh. Amama afa' ina wasapa'epa mehpa pembe'am, owa'. Ukup ipe'imi atom pendanda' ma pese'asam.

⁶ Ipe' ukup mopoma enin epen nawa gwa'aimi kwawie'im. Anona nemaf enin nela' kwawie'im. Epen nawa hiami anona nemaf nela' hiami.

⁷ Ea' ipe' hipei ata' pili' ukup motamea ande-ande' atona etin ea' pila nomonas amama atom pese'as amamaga. Na'ama enin epen okom aona nese'as amamaga ananiami o enin epen ni'i enis epes si'ipan mehpa nese'as na'ama, owa'. Dei' main, God okom nainaila epes isima sandanifel sase'as amamaga. ⁸ God Anan wilama nese'epa amamaga bu'wami hiami ipe' ma nambimb ipe' si'ipamam endilisi. Anan nanda'am na'ama ma nimeguf hiemi ipe' penda'am peso' enis epes ina hi'ilam, owa'. Mo'oh la'ela'ef. Ea' ipe' amamaga hiamipei penda' opeh bu'wami hiami mamumami ma pigiambama enis epes wapoti'.

⁹ Si'i Baibel na'iam na'i,

“Epes isima sase'as amamaga hiami epes isima amamaga a'asi. Ea' epes hiesi ukup mapoma waf bu'unai asasinai la'ela'ef hi-hif.”

¹⁰ La'ela'ef God nase'as olelemb gwa'aimi hi-ami epesa sawam aof. Ea' nase'as gwa'aimi mamumami hiami epesa sagwa'am. Ea' nambimb nese'epa amamaga ipe' wapoti' ma pese'asam

enis epes. Ama amamaga amama ipe'imi motaga lu'um endilisi ma pese'asam wapoti', si'i enin epen nawa olelemb gwa'aimi ma anom nimeguf mafe' ea', nala' gwa'aimi hiami endilisi nefa'am. ¹¹ Nambimb ipe' pefa' amamaga hiami ma la'ela'ef la'ifipama peso' alupusi kwahusi ma amamaga hiami. Nema'f mamana afa' ofa' amamaga amama ipe'imi ma oso'asam alupusi isima, waf bu'unai ipe'inai nanda' esis sanifela God.

¹² Ipe' penda'am na'ama ma pigiambama alupusi isima amam nematawa Godi ma waf anama, ipe' panda' opeha pagiambama epes isima kwahusi. Ea' ina amama atom, owa'. Ipe' panda' waf anama pafela epes hiesi ma sefela agel Godi sinifelona endilisi. ¹³ Waf anama ipe'inai nandawalap alihiguma nihi'amba epes hiesi ma ipe' paila basef Godi andeande'. Ea' enis epes wapoti' sefela agel Godi lu'una ma ipe' paila basef bu'wami Kraisi pawalapama pagiambama esis saloma enis epes wapoti' hi'alas. ¹⁴ Ea' esis nambimb ukup mimilipa endilisi ma sonda' betena ipe'. Dei' main, esis sogawa waf Godi nagiambamepa na'a nape lu'una endilisi ma ipe'. ¹⁵ Waf anama God nase'apanai, anama lu'una endilisi. Ea' ape' basef a'apa ma mi'ipa epes a waf anama bu'unai Godi. Ape' minifela Goda waf anama Ananinai.

10

Pol nahagofa basef awami sanda'manami

¹ Ae' Pol ahali'ipa nimanis aila waf Kraisi so'umbilinai si'i anan nanda' okom ananinai

nefe' owina epes hiesi. Dei' anifelipa ma anom amamaga etifim. Enis epes sambaso'me sa'ipi na'ama sa'i, "Anan ata' nape naloma ape' nanda' anan nafe' sa'osa'ona nafe' owin, ea' nogota anama nafe' napani laogon nanda' basef la'ifimi ma ape'."

² Ae' ihali'ipa na'ama. Anona nemaf ae' etagamepa, ipe' pindumafuma andeande'. Na'ama pehafa ae' i'ipipa basef la'ifimi si'i ae' okom na'i ewalapama enipa. Ae' ewalapama ipe' pa'i afa' wafe' waila waf aonai etapanai.

³ Endilisi, afa' wape wafe' etap anae', ea' ina wape wanda' wandaf si'i epes etapasi sapa', owa'.

⁴ Amamaga hiami sapa'ami afa' wahapilami amam ina etapami, owa'. Amama pepel Godi, la'ifnai ma notala endalelemb pepel naumbih Seteni.

⁵ Afa' wahagofa nomonas epes isima owa' endilisisi. Ea' waf hianai nasopama eafa epes sa'i sogawa Godi, anama afa' wahagofana wasopamana wapoti'.

Ea' afa' wali'amona nomonas hiami ape' epesi ma onda'am bo'om mila okom Kraisi.

⁶ Afa' wandandombol wape ohafa ipe'. Ama i'i ipe' pila basef hiami afa'imi, afa' nambimb ogwamasa nimanimi awami emi egafis sosambala basef Godi.

⁷ Ipe' pati amamaga mape naep ipe'imi atom ande' atogon, nomon owa'. Dei' piti amamaga ofagema. I'i emi egafis sope la'ifis si'i esis epes Kraisi, esis sogawa afa' wapoti' wape epes Kraisi.

⁸ Dembinai nase'afa agof lu'wami afa' ma onda' maol anama ananinai, amama monda' bale'ef ipe'inai notaga la'ifina. Amama ina mohambom-

bagepa, owa'. Ama ae' i'i efela agof afa'imi atoma maol anama Dembinai, nambimb ae' ina ambal aona ma amama, owa'. ⁹ Ae' andaiwa' endilisi ma ipe' pi'i ae' aumbelipa etina anom pasa basef amama ae'ami, owa'. ¹⁰ Dei' main, enis epes sa'i, "Pasa basef ananimi nimanim endilisi ea' la'ifim endilisi. Ea' anan nafi'i natagamapa ma matolona naep ape'imi, ina la'ifina ea' basef ananimi falafumi atom." ¹¹ Epes sa'i basef na'ama, ata' ukup mi'i andeande' sogawa na'ama. Afa' wape laogon ea' wanda' basefa pas atoma ipe'. I'i afa' ope olomepa, onda' waf anama atona basef amama atom si'i wanda'am mail pas.

¹² Afa' ukup hiahiam dei' wandaiwa' ma wi'i afa' wandati na'ama etin si'i epes safela agof asasimi atom lu'wami, owa'. Epes isima sawaloga waf asasinai ma ikwaf ukup asasimi atom. Ea' sawalogam na'ama. Esis isima owa' sogawai, ukup mololasi. ¹³ Ea' afa' wandaiwa'ma usila' ikwaf afa'inai ma ofela agof afa'imi ilif endilisi, owa'. Afa' wa'ila ikwaf God nawalogafa nase'afa maol ananinai. Afa' waila amama ea' wafe' wataga ma ipe' wanda' maol anama. Ea' wafela agof afa'imi ma maol anama atona. ¹⁴ Afa' wame' basefa God wailam wafo'o watagama ipe' dende' ma alol anan nandandepamafagoma. Ea' afa' ina umbisila' alola maol anama ma wawalip- ipa basef ananimi, owa'. I'i afa' owa' ome' basef Ananimi na'ipipami ugi'mam, afa' umbisila' alol. Owa'etin. Afa' wafo'o ofa'ago basef bu'wami atom Kraisi watagamepa. ¹⁵ Ea' afa' ina umbisila' alola ofela agof afa'imi atoma anona maol enis epes sanda'anai, owa'. Afa' ukup matamea

la'ifim na'ama. Maol anama afa' wanda'anai, ipe' nambimb pembale'efa Kraiss la'ifipa pikila' fowa' pali' pambale'efana. Ea' maol anama nataga lu'una la'afena ipe' nikila' fowa'inai. Afa' wali onda'ana la'ela'ef nendahama ikwaf God nase'afanai. ¹⁶ Wa'iam na'ama ma afa' ata' ofa' basef bu'wami Godi ofo'o laogon anona etap nape alafugaha ipe' ganima wa'ol. Ama afa' ina umbisila' ofe'ma maol anama amani ofela agof afa'imi anona maol aman anama nanda'ana ea', owa'.

¹⁷ “Epen nindanifel, enin nendanifel ma Dembinai atona.”*

¹⁸ Dei' main, ape' mogawa emi egafis sefela agof asasimi atom, esis agof a'asa naep Dembinai, owa'. I'i Dembinai nefela agof anis epesi, dei' epes isima etis sofa' agof endilisi.

11

Pol nawalapa waf baso'mainai amam aposel mambaso'ami

¹ Ae' a'i ipe' pekwaha aho'ma ata' enda' anom basef falafumi kwawie'im. Ipe' ata' kwahowae.

² Dei' main, God okom nainaila epes endilisi ma na'i nondandepasa sope ananisi etis. Ama waf anama atona ae' okom nainaila ipe' endilisi. Ae' andandepapa ea' ma peso' anona aman atotona, anan Kraiss. Ae' a'i eselepa pefe'ma Anan si'i nemata'w awiawai'wi kwape bo'okw endilisi.

³ Ea' ae' umbamahe. Na'ama ukup ipe'imi aom ea' pekwaha waf anama pepan andeande' ukup

* **10:17:** Basef amama ma'i epen nendanifela Godi mape Olpela Testamen Jeremaia 9:24.

mopoma Kraisi atona si'i fowa' gani yul anama gawainai nambaso'ma Iv. ⁴ Dei' main, enis epes safi'i satagama ipe' sawalapa basefa anona Jisas, anan ina Jisas anama afa' wawalapa basef wa'ianai, owa'. Ea' ipe' dei' pefa' anona ambal, ina Ambal Bu'unai Godi fowa' ipe' pefa'anai, owa'. Ea' ipe' pefa' anom basef, ina basef amama bu'wami Godi pefa'ama afa', owa'. Epes isima safi'i sambaso'mepa sa'i anom basefa anona Jisas la'afena ipe', ea' pa'i aho'ma epes isima pandagalamas pa'i basef asasimi bu'wami.

⁵ Ipe', peme'e! Ae' ina okom na'i ae' gawa a'e ape la'afena amam "aposel amama ipe'imi mali'i," owa'. ⁶ Endilisi ae' ina egawa endilisi ma waf anama ewalapa basef, owa'. Ea' hapaiwei, gawa ae'anai ma basef Godi ina bandana, owa'. Nimeguf hiami ma waf hianai afa' wanda'anai wihi'ambepa gawa anama hianai ma ipe'.

⁷ Ipe' pegawa nimeguf amama ae' awalapa basef bu'wami Godi ma ipe', ae' ina efa' anom otamba ma amama, owa'. Anda' waf anama anda' ae' afe' owin afela ipe'. Dei' main? A'i waf anama anda'anai aonai o bu'unai? ⁸ Ae' efa' otamba maima enis Kristen sios sape anagon laogon sagiambame anda' maola agiambamepa. Waf anama si'i efa' amamaga asasimi etin. ⁹ Fowa' ape alomepa ata' ipelimi amamaga a'e, nogota anama ae' ina ahali'ipa ma amamaga amama, owa'. Dei' main, amam alupumi makwaha etap hiagoma Masedoniai mafi'i matagamepa muwapanimi amamaga amama ae' owa'i. Ea' ina ahali'ipa ma pase'e otamba maim, owa'. Ea' anona nemaf

wapoti' enda'am na'ama etin ina ihali'ipa ma anom amamaga, owa'. ¹⁰ Basef endilisimi Kraisi mape ae', amama endilisimi atom. Ea' anom basef wapoti' endilisimi atom na'ama. Anama hiagoma esis Grik sapoma ina anona nemaf anona aman atotona la'ifina ma nohopa eafa ae' efela agel ae'anai ma waf anama efa' otamba maima ipe', owa'. ¹¹ Pa'i ae' afela agel ae'anai na'ama ma main? Pa'i ae' ina okom nainailipa ea' dei' afela agel ae'anai? Owa'. God nogawe ea', okom ae'anai nainailipa.

¹² Ea' anom amam ma'i mogolopa eafa mofela agof amamumi atom ma'i motaga na'ama etin si'i afa' ma naep epesi. Ea' anda' maola ahopa eaf amamunai. Ae' anona nemaf enda'am na'ama etin epe. ¹³ Amam amama aposel mambaso'ami manda' maol baso'omunai. Amam mondola'wifa etina amam aposel Kraisi, ea' mambaso'ami. ¹⁴ Ea' ipe' ina pehafel gegelalasipa ma amama, owa'. Ape' mogawa Satan atona nandala'wifa ensel nafifili nafe' hiagoma. ¹⁵ I'i amam manda' maol ananinai wapoti' mondola'wifa sanda' maol bu'unai waf bu'unai, amama ina anom amamaga manda'apa gegelalasepa, owa'. Anona nemaf amam mofa' nimanimi awami monda-hama maol amam manda'anai.

Pol nofa' nimanimi hiami ma maol Godi

¹⁶ Do'ok ali' a'iam, dei' a'iam wapoti'. A'i enin epen ina okom ni'i ae' okom nololae, owa'. Ea' dei' ae' a'i ipe' ata' pi'i aho'me i'i basef si'i epen okom nonolani. Pi'i aho'ma ma ae' efela agel ae'anai endanifel nogota bandana. ¹⁷ Ae' ina aila Dembinai a'i basef amama, owa'. Ae' a'i

si'i okom nololaiwei ma la'ifiwi efela agel ae'anai atona. ¹⁸ Epes hiesi saila waf etapanai safela agof asasimi atom, ea' ae' a'i enda'am wapoti'. Dei' i'ipipa anom basef si'i epen okom nololani. ¹⁹ Ipe' hipei gawaipei etipa. Ea' ipe' ukup mohafel endilisi pa'i aho'ma esis ukup mololasi sa'ipepa basef mamumami falafumi ma ipe'. ²⁰ Endilisi, ipe' ina pa'i aho'ma esis isima ukup mololasi etis, owa'. Ipe' pa'i aho'ma amam emi egafum mombaso'ami mafi'i mefa'epa pafe' owina amam. Amam mefa' amamaga hiami ipe'imi mafela agof amamumi atoma ma makolaombepa. Amam manda'epa na'ama dei' pa'i aho'mam ²¹ Amam manda' waf aonai nikila' afa'. Ea' afa' ina la'ififa onda' waf anama amam manda'anai, owa'.

Dei' ae' ata' i'i basef si'i epen okom nonolani. I'i enin epen la'ifina nefela agel ananinai atona, ae' wapoti' na'ama etin. ²² I'i amam Hibruimi, ae' wapoti'. Amam epes Israelimi, ae' wapoti'. Amam wambota Abrahami, ae' wapoti'. ²³ Ae' dei' a'i si'i epen okom nololani endilisi. I'i amam monda' maol Kraisi, ae' wapoti' anda' maol Kraisi ikila' amam. Nimanimi lu'wami, amama ae' ikila' amam ea' kalabus wapoti' anda' kalabus ikila'am. I'i enis epes soham hihif endilisi, amama wapoti' ikila'am endilisi. Nimeguf hiami ae' felefele' ma ega'. ²⁴ Wanom biam Juda sahe wip mehipe hiami timbi tambel 39-peleim. ²⁵ Nimeguf wanom sahe ala'ota. Anona nemaf sahe otamba. Galafowa aom nimeguf wanom ea' aowe naoh embel. Ea' nemaf si'ina atotona owamb si'ina atotona ae' alemb ala naoh embel la'afen. ²⁶ La'ela'ef ae' afe' laogoma eaf

lounai. Ae' a'i higilili ewala walembekh hiami afe'ma. Amam amama manda' waf aonai manda' wali mafe' eafi ma'i mohe. Esis esimbel etifim Judaisi sa'i sohambombage ea' epes isima owa' Judaisi wapoti' sa'i sehe. Enis epes sa'i sehe taun ea' anama etap wafiguma wapoti', naoh embel wapoti'. Ea' anom alupumi mambaso'ami wapoti' ma'i mohambombage. ²⁷ Ae' efa' nimanimi lu'wami mamumami. Owambekh hiami la'ela'ef ina a'oh andeande', owa'. Nimeguf hiami ina a' gwa'aimi embel maim, owa'. Eap nase'e nolomahe a'i ega' etin. Anom nimeguf hiemi elelama gwa'aimi, luwaguf maim a'e no-manamb mae.

²⁸ Ea' ina amama atom, owa'. Nimeguf hiami ae' okom natanea nafe' ma esis Kristen hiesi sape hiagomai sape sa'imama? Sembale'efana la'ifis, o owa'? ²⁹ Emi egafis owa' la'ifis, ae' wapoti' ina ame' la'ifiwi, owa'. Ea' emi egafis sowa ma waf aonai, ae' wapoti' efa' namanimi alomas.

³⁰ I'i ae' efela agel ae'anai, afelona ma amamaga maim mihi'ambepa mawalapa ae' owa' la'ifiwi. ³¹ God, anan God Dembinai Jisasi Ahalomana wapoti', ape' mefela agel ananinai la'ela'ef! Anan nogawa basef amama do'ok ali' a'iami ina ambaso'am, owa'. ³² Fowa' wambel Damaskus, dembinai gavman nape owina dembinai king Aretas anan nanda' amam maitu mumafi uta endalelemb sawis taun Damaskusi. Anan na'i nombale'e. ³³ Ea' anom alupumi mafli' manda'e atolo'w halaf malae ewala uta so'unai endalelemba taun anama ande'. Amama atom dei' akwaha lagof gavman anama ea' afa' afe'.

12

Pol na'oh nandondo'oh God nihi'ambana basef hiami

¹ Ina anona eaf wapoti', owa'. Ea' ae' efela agel ae'anai atona wapoti'. Anda'am na'ama ina la'ifima miyambamapa, owa'. Ea' hapaimi, ae' enda'am. Dei' ae' a'i i'i basefa enin epen na'oh nandondo'oha basef mape mandambahi'i God nawalapameam ma ae'. ² Ae' egawa anona aman* Kraisi, basef ananiami mape na'ama. Fowa' afagof 14-peleim mafe'ma ea', God nofa'ana nalata ilif heven nafe'ma wenifiguma gani ilif. Aman anama ambal atona nalata o naloma alop nalata, ina egawana. God atona nogawana. ³ Ea' ae' egawa aman anama God nofa'ana nalata ilif heven. Aman anama ambal atona nalata o alop napaina nalata ae' ina egawana. God atona nagawana. ⁴ Gani ilif heven anan name' basef hiami mamumami epes owa' la'ifisa si'iama diga, God nandaiwa' ma epes sowalapami. ⁵ Ae' a'i efela agel aman anama lu'una. Agel ae'anai owa'. Ae' i'iam i'i ae' owa' la'ifiwi, ea' amama atom efela agel ae'anai. ⁶ Endilisi, i'i ae' efela agel ae'anai atona, ae' ina si'i epen okom nololani, owa'. Dei' main, a'i endilisi etin. Owa'etin. Ae' andaiwa'. Na'ama enin epen ni'i ae' epen bu'uwei endilisi ikila' waf fe' pe ki ae'anai. Ae' a'i ipe' piti waf ae' anda'anai peme'e ma basef ae' a'iami. Ea' na'ama etin ipe' pegawa waf ae'anai andeande'.

* **12:2:** Basef amama ma'i anona aman Kraisi ma'i Pol atona, ea' anan nambaho' agel ananinai.

Amamaga si'i higata nape alop Poli

⁷ Basef amama God nihi'ambeam ae' lu'um endilisi. God nandaiwa'ma efela agel ae'anai endilisi, owa'. Amama atom dei' nase'e anom amamaga si'i higata nape alop ae'anai ekep pahe. Amama anona ensel Satan nasapa'ana nafi'i ma nanda' ae' ekep pahe. Amama manda' agel ae'anai nowala. ⁸ Ae' anda' betena Dembinai wenifa anan ata' notofa amamaga manda'e ekep pahae, epan andeande'. ⁹ Ea' anan na'ipi na'ama na'i, "Ae' agiambamena na'a, waf anama la'ifinai ma ine'. Dei' main, pepel ae'anai anama nanda' maol la'ifinai endilisi ma epes owa' la'ifisi."

Ea' ae' dei' ina ata' okom aona, owa'. Ae' andanifel endilisi ma amama ma pepel Kraisi napaiwe. ¹⁰ Amama atom dei' maol anama Kraisi etin, ae' ina la'ifiwi, owa'. Esis sanda'me waf aonai ea' sanda'me nimanimi mamumami hiami, enis sahambombage. Ea' hapaimi. Ae' andanifel ma amamaga amama. Nemaf anama ae' owa' la'ifiwi, nogota anama ae' la'ifiwi endilisi.

Pol na'i nonda' esis Korin sotaga la'ifis

¹¹ Basef amama aho'ma'iami amama basef falafalafumi a'iam si'i epen okom nololani. Ea' ipe' pefela ae' dei' a'iam na'ama. I'i ipe' pefela agel ae'anai, anama waf bu'unai. Owa'etin. Endilisi, ae' epen falafuwe, ea' ina afe' owina amam amama "Aposel ipe'imi" mali'i, owa'etin. ¹² Ae' anda' okom ae'anai la'ifina ea' anda' ik-waf la'ifinai hianai la'afena ipe', awalapai ik-waf hianai aposeli. Amama na'ama. Amama la'ifimi si'i God nanda'ami mataga hiami mamumami la'afena ipe' mandahama maol Godi.

Sati pepel anama, esis gegelalasis kwapete'as. La'ifimi amama mihi'ambepa ae' aposel endilisiwei. ¹³ Ipe' ina pape owina enis Kristen sios sape ganigani, owa'. Ipe' palomas pape dende' etina waf hianai ae' anda'mepanai. Ea' anona waf aonai† anda'mepana ipe' etipei ma esis owa', anama na'ama. Ae' ina a'ipipama anom amamaga ipe'imi, owa'. Dei' ae' ati uwahipipa, ipe' pekwahome waf aonai anama anda'mepanai.

¹⁴ Dei' andandombam efe'mago ipe' ma wenif, ea' ae' ina nambimb efa' amamaga ipe'imi, owa'. Dei' main, ae' andaiwa'ma efa' amamaga ipe'imi, owa'. A'i efa'ai ipe' etipa. Ipe' pegawa, ipe' si'i awasi ae'ipei. Ina andeandema esis awasi sogolopa amamaga sigiambama mamasas asasisi, owa'. Esis mamasas etis, sanda' maol sagolopama amamaga sagiambama awasi. ¹⁵ Ae' okom na'iam endilisi ma ekwaha amamaga hi-ami ae'ami ea' elelama ambal ae'anai ekwahona igiambamepa. Ae' okom na'i na'ama. Waf ae' okom nanailipanai nataga nape lu'una endilisi la'ela'ef nikila' fowa'. Ea' waf ipe' ukup maimilianai nowala sa'osa'ona endilisi la'ela'ef nape.

¹⁶ Ea' ipe' pegawa fowa' ae' ina ase'epa ni-manimi ipe', owa'. Ea' enis sa'i na'ama sa'i, “Endilisi anan ina nofa' amamaga ape'imi alihim, ea' anan aman nakikipapa ma waf baso'mainai ea' nefa'apa mailana.”

† **12:13:** Pol ina nanda' anona waf aonai, owa'. Anan na'i nefela ukup asasimi ma sogawa anom amam esis Korin sofalom aposeli. Amam mawalipasa basef Godi esis Korin mofa' otamba, ea' Pol owa'.

17 Endilisi fowa' asapa' anom amam mafe'mago ipe'. Dei' si'i main? Ae' ina ambaso'mepa efa' anom amamaga ma lagof ipe'imi. Owa'. 18 Ae' afela Taitus a'ipana nafe'mago ipe'. Ea' asapa' owalomapa anama nafa'o nalomanago. Taitus ina nambaso'am nefa' amamaga ipe'imi, owa'. Afa' dei' waila waf bu'unai ukup etifim. Ipe' pegawa afa' waila eaf atotona wafe'.

19 Ipe' ina pi'i afa' wanda' basef amama hi-ami wali' wa'iami wa'ipipa waf afa'inai ina aona, ea' wanda' waf bu'unai atona, owa'. Afa' wape epe Kraisi wanda' basef amama ma naep Godi. Alupipei endilisi ae'ipei, afa' wanda' basef amama hi'alama monda' ipe' pembale'efa God petaga la'ifipa. 20 Ae' umbamahe a'iam na'ama a'i nabimb efo'o etaga ma itilipa ina pepe bo'wepa si'i okom ae'anai na'i efo'o iti ipe' pepe bowepa, owa'. Ea' ipe' wapoti' nambimb piti ae' ina epe bo'awe si'i pa'i piti ae' epe, owa'. Na'ama waf naninani hianai nope. Basef lopa' fitapaimi, waf kowalepa ma anom amamaga, migimigah, findiwa, daha basef, sasambala basef, basef manda'as sanda hape'ma sape deindei'. Ea' ipe' ina peme' andeande'ma pila ukup etifima waf sanda' lotuwani, owa'. Paila ukup deindei'. Ae' umbamahema amama. 21 Nema'anama ae' efe'mago ipe', God ae'anai nambimb nonda' agel ae'anai nowala ma naep ipe'imi ma alopa ipe' amam nematawa hipei fowa' panda' waf aonai owa' pemboma opalef pefe'ma Gode. Ma ipe' owa' pewa' alafugaha waf aonai so'a waolanai ma opalef awami maloma amamaga

awami fowa' pali' panda'ami. Ae' umbamahema amama.

13

Esis Korin sundumafuma ma bale'ef asasinai andeande'

¹ Nambimb ae' efe'mago ipe' ma wenif. “I'i enis epes sombaso'ma enin epena anom basef, ama i'i enis epes bias o wenis si'i basef etifima waf anama, basef amama* endilisi atom.”

² Fowa' ae' ali' afo'o bif ape alomepa, ae' a'ipa enipa mehipe' a'iam na'ama a'i, “Ipe' pindumafuma andeande'.”

Dei' ape laogon a'ipipago wapoti' na'ama a'i nemaf anama ae' efo'o wapoti', ina iti enis soloma ipe' pali' panda' waf aonai i'i bu'upei, owa'. Ewalogepa ili'amonepa mehipe'. ³ Nemaf anama atona ae' ewalipipa, ipe' pegawa endilisi si'i Kraisi na'i basef mataga malogel ae'anai. Ipe' pegawa endilisi. Kraisi ina falafunai ma nanda' maol nalomepa, owa'. Anan la'ifinai. ⁴ Endilisi, fowa' anan ina la'ifina endilisi ma dei' saundana lawag usi'inai tu'wanainai sahana naga', owa'. Ea' pepel Godi atona nafelona dei' nape dambainai. Afa' walomana, afa' wapoti' owa' la'ififa. Ea' pepel atona Godi dei' afa' wape dambaifai walomana ea' nambimb owalapa pepel atona la'afena ipe'.

⁵ Ipe' la'ela'ef pewaloga opalef ipe'imi pewalogam andeande'. Ipe' pembale'efa God endilisi o owa'? Ipe' pewaloga ipe' etipa. Ipe' pegawa

* **13:1:** Basef amama ma enis epes sambaso'ma enin epena ma waf aonai, amama mape Diuteronomi 19:15.

Krais Jisas nape opalef ipe'imi o owa'? I'i ata' owa', ikwaf ipe'inai ina dei' pafe' pataga dende', ata' owa'. ⁶ Ae' egawa a'i dei' ipe' pegawa ikwaf afa'inai wafe' wataga dende'. ⁷ Dei' afa' wanda' betena God nigiambamepa ma ina penda' anona waf aonai, owa'. Afa' ina wanda' betena ipe' na'ama ma otaga ondawalap alihifa ma naep epesi ma si'i ikwaf afa'inai dende', owa'. Afa' wanda'ana ma ipe' penda' waf bu'unai ande-ande', ea' afa' hapaifai. Afa' wandawalap alihifa ma naep epes hiesi sambaso'am sa'i ikwaf afa'inai ina nafe' nataga, owa'. ⁸ Ipe' pegawa afa' ina onda' anom amamaga ma mohagofa basef endilisimi, owa'. Afa' la'ififa ma wanda' maola wa'ipasa basef endilisimi atom. ⁹ Maina nemaf afa' wame' ina la'ififa ea' ipe' pape la'ifipa, afa' wandanifel endilisi. Ea' afa' wanda' betena God la'ela'efa nonda'epa petaga la'ifipa bo'wepa andeande'. ¹⁰ Dei' ape laogon anda'ago basef amama mafe'mepago ma main? Ae' anda'am na'ama ma nambimb efo'o epe elomepa ae' ina i'ipipa basef la'ifimi endilisi ma pepel Dembinai nasi'ianai, owa'. Pepel anama enin ina nase'eam ma nohambombaga ipe', owa'. Anama nonda bale'ef ipe'inai notaga la'ifina.

Anom basef tu'wanim

¹¹ Kristen alupipei, dei' embefa basef hi'ilam a'i nemaf bu'unai inifelipa. Ipe' penda' maol la'ifipa endilisi ma petaga bo'wepa andeande'. Ea' peme' basef ae'ami. Ipe' pefa' ukup etifim ea' pepe opalef etifim awanem. God, anan ofagonama waf ukup naloma opalef awanemi nope nolomepa.

12 Waf ape'inai amam nematawa hiapai atona etin Godi, pese'ama lagof pelomago esis alupusi.

13 Amam nematawa hiesi Godi sanda'mepago nemaf bu'unai ma ipe'.

14 Ae' a'i Dembinai Jisas Krais niti uwahipipa nigiambamepago na'a ma okom Godi bu'unai nainailipa. Ea' a'i Ambal Bu'unai Ananinai nope noloma ipe' hipei ma pelomana opalef etifim pepe.

BASEF BU¹WAMI GODI
The New Testament in the Filifita Language (Ilahita
Dialect), East Sepik Province, PAPUA NEW GUINEA
Nupela Testamen long tokples Filifita long Niugini

copyright © 1998 Wycliffe Bible Translators, Inc.

Language: Filifita (Filifita dialect of Mufian)

Dialect: Filifita or Ilahita

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-18

PDF generated using Haiola and XeLaTeX on 21 Feb 2024 from source files dated 9 Oct 2020

042dd872-74b3-5958-88ef-d4db936348e2